

فريق التفريغ بموقع الطريق إلى الله

يقدم

من سلسلة "المصارع"

قصة الصراع ٢

(باللهجة المصرية)



لفضيلة الشيخ: محمود المصري

رابط المادة: <http://www.way2allah.com/khotab-item-27612.htm>

السلام عليكم ورحمة الله وبركاته

بسم الله والحمد لله والصلاة والسلام على رسول الله - صلى الله عليه وعلى آله وسلم - أما بعد:

فمرحبًا ياخواني وأخواتي وأهلي وأحبائي مرحبًا بكم مرة أخرى مع المصارع، ومن على حلبة المصارعة ومن مكان البطولة الحقيقية نقول مرة ثانية وبندكر بالبرنامج بتاعنا هنصارع الشيطان وإن شاء الله هنتصر عليه وهنقدر بفضل الله - سبحانه وتعالى - إننا نقاوم كل فتن الشبهات والشهوات وهنثبت ونمشي ورا حبيبنا محمد - صلى الله عليه وسلم - علشان نوصل لجنة الفردوس ونجتمع هناك، وهأفكركم وأقول لكم فاكرين لما التقينا في رمضان على قناة اقرأ واتكلمنا عن المصارع وقلنا لازم نصارع كل الشهوات والفتن دي علشان ربنا يجمعنا في الجنة وادينا انتصرنا وبقي كل واحد فينا فعلاً حمل لقب المصارع، وقدر بفضل الله إنه ينتصر على كل الفتن رغم إن الإغراءات كانت كثيرة قوي والأشياء اللي ممكن تدعونا للفتن كثيرة قوي لكن كان إيماننا أقوى وثقتنا بالله كانت أقوى علشان كده ثبتنا ووقفنا وأثبتنا إن احنا عباد الله وحققنا قول المولى عز وجل **"وَمَا خَلَقْتُ الْجِنَّ وَالْإِنْسَ إِلَّا لِيَعْبُدُونِ"**

الذاريات: ٥٦

أخويا وحبيبي وأختي الفاضلة اتكلمنا في الحلقة اللي فاتت عن ١٠ حاجات عشان أي واحد في الدنيا يبقى مصارع لازم يعملهم وعلشان أنا أكون عبد لله لازم أعملهم عشان أقدر أصارع كل الفتن وكل الأعداء اللي بيحولوا بيني وبين طريق ربنا سبحانه وتعالى، وقلنا هنتكلم النهارده عن بداية قصة الصراع، وأكد حضراتكم مشتاقين من امبارح وتقولوا يا ترى قصة الصراع دي بدأت ازاي وليه وامتى؟ وهنصارع مين وهنصارع ازاي؟ ده اللي هنعرفه الليلة دي بس تصل على حبيبيك - صلى الله عليه وعلى آله وسلم -.

قصة الصراع إن ربنا - سبحانه وتعالى - حدد لنا مين هو العدو الحقيقي اللي لازم نصارعه **"إِنَّ الشَّيْطَانَ لَكُمْ عَدُوٌّ فَاتَّخِذُوهُ عَدُوًّا"** فاطر: ٦ سبحانه الله، لكن يا ترى إيه هي قصة الصراع؟ وبدأت ازاي؟ ده اللي احنا هنعرفه واحنا على يقين من جوانا إنه أي شيء في الكون ده احنا بنصارعه فاحنا في الحقيقة بنصارع الشيطان نفسه، لأن مين اللي زين للبنات التبرج؟ ما هو الشيطان، ومين اللي زين للإنسان إنه مايصليش؟ ما هو برضه الشيطان، ومين زين للرجل إنه ياكل لقمة حرام ما هو برضه الشيطان، فكل مشكلة هتلاقي وراها في الغالب يا إما شيطان جن، يا إما شيطان إنس، وشيطان الإنس أحيانًا بيكون أشد وأقوى وأقوى تأثير كمان من شيطان الجن، فنسأل الله أن يعيذنا وإياكم من شياطين الجن والإنس إنه ولي ذلك والقادر عليه.

إمتى بدأ الصراع؟ وازاي كانت البداية؟

بدأ الصراع إمتى؟ بدأ الصراع منذ خلق آدم -عليه السلام-، وازاي بدأ الصراع؟ هأقول لكم بس تصلوا على حبيكم -صلى الله عليه وعلى آله وسلم-، في يوم من الأيام الكلام ده زمان قوي قوي قوي شاء الله عز وجل أن يخلق آدم -عليه السلام- وأن يجعل من آدم ذرية، الذرية دي في يوم من الأيام هتنزل وتظهر على الأرض وتعمر الأرض، تعمرها بالطاعة وتملاها برضه بكل خيرات الدنيا علشان يبقى فيه أسباب المعيشة متوفرة والناس عايشة وتعمر الكون وتبدع وتؤثر وتبتكر علشان الدنيا كلها تعيش وتتقدم بفضل الله -سبحانه وتعالى-.

المولى عز وجل أخبر الملائكة.. والملائكة كما تعلمون **"لَا يَعْصُونَ اللَّهَ مَا أَمَرَهُمْ وَيَفْعَلُونَ مَا يُؤْمَرُونَ"** التحريم: ٦، حتى إن حبينا -صلى الله عليه وسلم- في ليلة الإسراء والمعراج يا جماعة لما صعد رأى ٣ مشاهد عجيبة جدًا؛ رأى ملائكة وظيفتها كلها إنها وقوف تعبد الله عز وجل، ملائكة تانيين ركوع راکعين لله عز وجل، وملائكة تاليتين سجد لله سبحانه وتعالى، حتى إن الملائكة اللي ساجدين يوم القيامة وده منذ خلق آدم -عليه السلام- وهم سجد لله فإذا قامت القيامة قاموا من تلك السجدة وقالوا سبحانك ما عبدناك حق عبادتك.. يا الله!

فالنبي لما شاف هذه المشاهد سأل المولى عز وجل أن يجمع له تلك المشاهد في عبادة واحدة فكانت الصلاة، اللي كثير من المسلمين هجرينها، فكانت الصلاة تجمع الثلاث مشاهد، والثلاث مشاهد من العبودية الجميلة اللي موجودة عند الملائكة.. قيام وركوع وسجود بفضل الله سبحانه وتعالى فالنبي -صلى الله عليه وسلم- شاف المشاهد دي ليلة الإسراء والمعراج، والملائكة **"لَا يَعْصُونَ اللَّهَ مَا أَمَرَهُمْ وَيَفْعَلُونَ مَا يُؤْمَرُونَ"** التحريم: ٦

حرص الملائكة على طاعة ربنا

الملائكة لا يياكلوا ولا يشربوا ولا عندهم شهوات ولا عندهم أي حاجة غير إن هم بيعبدوا ربنا وبينفذوا أوامر ربنا سبحانه وتعالى، فلما المولى -عز وجل- شاء أن يخلق آدم -عليه السلام- وشاء أن يخلق البشر.. الملائكة زعلوا، زعلوا ليه؟ زعلوا إن هيكون ليهم منافس؟! مش ده الموضوع هم مايفكروش في كده، هم بيفكروا في حاجة تانية يا جماعة، حاجة كبيرة أوي فوق مستوى تفكير البشر، فكروا في إن طيب يا ترى احنا قصرنا في حق ربنا!، طيب احنا قصرنا في العبادة!، طيب احنا عملنا حاجة أغضبت ربنا علينا! كانوا خايفين إن هم يكونوا قصرنا في حق ربنا، كانوا خايفين إن هم يكونوا عملوا حاجة أغضبت ربنا عليهم سبحانه وتعالى.

شفت أد إيه حرص الملائكة، يا ترى عندك حرص في يوم من الأيام إنك تقول يا ترى أنا فعلاً قصرت في حق ربنا واحنا كلنا بلا استثناء مقصرين في حق ربنا بجد، بجد مقصرين في حق ربنا، لأن احنا لو حينا نشكر ربنا.. حبينا سيد ولد آدم -صلى الله عليه وسلم- أخشى الناس وأتقى الناس كان يقول **"سبحانك لا أحصي ثناء عليك، أنت**

كما أثبتت على نفسك" صحيح مسلم، مجرد إن أنا لو حبيت أثني عليك أنا ما عرشف، فكيف نوّقي فضل ربنا في العبادة وفي الطاعة وفي كل شيء **"وَإِنْ تَعُدُّوا نِعْمَتَ اللَّهِ لَا تَحْصُوهَا"** إبراهيم : ٣٤ ، فالملائكة خافوا يكونوا قصرُوا في حق ربنا أو يكونوا عملوا حاجة تغضب ربنا سبحانه وتعالى.

وبعدين هو كان فيه مشكلة تانية إن هم شافوا الجن حينما أفسدوا في الأرض وقتلوا مقتلة عظيمة فجاءت الملائكة فطردوهم إلى الجزائر والبحور وده كان قبل خلق آدم -عليه السلام- كما قال ابن عمر وليس هناك أي دليل على هذه المدّة، الشاهد في الموضوع الملائكة استغربوا فقالوا لربنا سبحانه وتعالى: **"أَتَجْعَلُ فِيهَا مَنْ يُفْسِدُ فِيهَا وَيَسْفِكُ الدِّمَاءَ وَنَحْنُ نُسَبِّحُ بِحَمْدِكَ وَنُقَدِّسُ لَكَ"** البقرة : ٣٠

يا رب ده الجن أفسدوا وعملوا مقتلة كبيرة جدًا وقد يكون الإنس لما هينزلوا الأرض وفيها منافع وفيها خيرات؛ قد يتكالبوا على المنافع والخيرات والكنوز والأموال والحاجات دي كلها فيحصل ما بينهم مقتلة هم أيضًا كما حدث بين الجن وبعدين احنا مقصرناش **"وَنَحْنُ نُسَبِّحُ بِحَمْدِكَ وَنُقَدِّسُ لَكَ"** يا رب احنا لو كنا قصرنا أوامرنا نزود في الطاعة وفي العبادة.

شوف حرص الملائكة على طاعة ربنا.. يا ترى عندك الحرص والحب ده على إن انت تطيع ربنا وتقدم أعلى ما عندك لله سبحانه وتعالى **"إِنَّ اللَّهَ اشْتَرَى مِنَ الْمُؤْمِنِينَ أَنْفُسَهُمْ وَأَمْوَالَهُمْ بِأَنْ لَهُمُ الْجَنَّةُ"** التوبة : ١١١ ، فكرت في يوم من الأيام إن انت كلك على بعضك ملك لله سبحانه وتعالى وإن إنت مهما قدمت ومهما عملت في النهاية إنت لا يمكن توّقي حق ربنا سبحانه وتعالى ولو في نعمة واحدة **"وَإِنْ تَعُدُّوا نِعْمَتَ اللَّهِ لَا تَحْصُوهَا"** إبراهيم: ٣٤ سبحان الله فقال جل وعلا ردًا على الملائكة **"قَالَ إِنِّي أَعْلَمُ مَا لَا تَعْلَمُونَ"** البقرة : ٣٠ ، أنا عارف إن الإنسان اللي أنا هاأخلقه قد يفسد في الأرض وقد يكفر، وقد ينكر نعمتي، وقد يأكل خيري ويعبد غيري وقد يفعل ويفعل ويفعل، لكن فيه خير تاني برضه موجود في الإنسان اللي جاي هيبقى فيه منهم الأنبياء والصالحين، هيبقى فيه منهم الصديقين والشهداء هيبقى فيه منهم المرسلين، هيبقى فيه منهم أولي العزم الخمسة، هيبقى فيه منهم محمد -صلى الله عليه وعلى آله وسلم-، هيبقى فيه خير كبير قوي رغم إن الشر هيبكون كثير وقد يكون أكثر لأن ربنا قال **"وَإِنْ تَطَّعَ أَكْثَرُ مَنْ فِي الْأَرْضِ يُضِلُّوكَ عَنْ سَبِيلِ اللَّهِ"** الأنعام : ١١٦

وقال جل وعلا **"وَقَلِيلٌ مِّنْ عِبَادِيَ الشَّاكِرُونَ"** سبأ: ١٣ ورغم ذلك عشان الخير اللي هيبقى موجود قال **"قَالَ إِنِّي أَعْلَمُ مَا لَا تَعْلَمُونَ"** البقرة: ٣٠، وبدأت الخطوة الفعلية المولى عز وجل شاء سبحانه وتعالى أن يخلق آدم أبو البشر، وبدأ الخلق فعلاً.

المولى عز وجل هيبخلق سيدنا آدم من تراب كما قال جل وعلا **"إِنَّ مَثَلَ عِيسَى عِنْدَ اللَّهِ كَمَثَلِ آدَمَ خَلَقَهُ مِنْ تُرَابٍ ثُمَّ قَالَ لَهُ كُنْ فَيَكُونُ"** آل عمران: ٥٩ ، وقال -صلى الله عليه وسلم- كما عند الترمذي بإسناد صحيح قال: **"إِنَّ اللَّهَ تَعَالَى خَلَقَ آدَمَ مِنْ قَبْضَةٍ قَبْضُهَا مِنْ جَمِيعِ الْأَرْضِ"** ، من كل تراب الأرض ومن كل تربة الأرض اتخلق سيدنا آدم، سيدنا آدم ما اتخلقش من حته معينة فمنهم ذريته يعني **"فَجَاءَ بَنُو آدَمَ عَلَى قَدَرِ الْأَرْضِ"**، فجاء منهم

الأحمر، والأبيض والأسود وبين ذلك السهل والحزن والخبيث والطيب" صححه الألباني طلع الناس أجناس وأشكال وألوان وطبائع منهم اللي طيب جداً ومنهم اللي خبيث جداً ومنهم اللي وسط ما بين الطيبة والخبيث، ومنهم الأحمر ومنهم الأبيض ومنهم الأسود طلعلوا كلهم على حسب طينة الأرض التي خلق منها آدم عليه السلام، أما عن تفاصيل خلق آدم عليه السلام.. ازاى اتخلق آدم عليه السلام؟ وربنا كلف مين يجيب له التراب بتاع الأرض عشان يُخلق منه آدم؟

بداية الصراع منذ خلق سيدنا آدم

قلنا يا جماعة إن بدأ الصراع منذ خلق أبينا آدم عليه السلام وبدأ الصراع بشكل عجيب جداً هتعرفوه دلوقت إن المولى عز وجل قرر أن يخلق آدم عليه السلام وبالفعل بدأت الخطوات الفعلية لخلق سيدنا آدم..

يا ترى سيدنا آدم اتخلق ازاى؟، المولى عز وجل كلف سيدنا جبريل أمره انزل يا جبريل إلى الأرض وهات لي من كل قطعة من تراب الأرض حتة صغيرة كده، عينة بسيطة كده من تراب الأرض بحيث تبقى لميت لي من كل بقاع الأرض وهات لي القبضة دي وتعالالي بيها.

ونزل سيدنا جبريل أمين الوحي وأمير الملائكة اللي كان بينزل على حبيينا محمد-صلى الله عليه وسلم-، نزل علشان ينفذ أمر المولى عز وجل فأول ما نزل، المولى عز وجل أنطق الأرض، الأرض اتكلمت وكلكم عارفين إن المولى عز وجل قال للسموات والأرض **"إِنِّيَا طَوْعًا أَوْ كَرْهًا قَالَتَا أَتَيْنَا طَائِعِينَ"** فصلت: ١١ ، فأثبت المولى عز وجل إن الكون دا كله له حس وإدراك وكلكم عارفين إن عرش مالك الملك وملك الملوك جل وعلا اهتز لموت تلميذ من تلاميذ النبي -صلى الله عليه وسلم- اللي هو سعد بن معاذ، وانتو عارفين إن حبيينا -صلى الله عليه وسلم- كان الحصى بيسبح في يديه وكان فيه حجر في مكة كان يسلم على رسولنا ويقول السلام عليك يا رسول الله والكلام ده كان قبل البعثة، وانتو عارفين حاجات كثيرة جداً تثبت لنا إن الكون ده كله ليه حس وإدراك والمولى عز وجل وضح لنا إن الدنيا دي كلها والكون ده كله بيسبح بحمد الله ويسجد لله، قال جل في علاه: **"أَلَمْ تَرَ أَنَّ اللَّهَ يَسْجُدُ لَهُ مَنْ فِي السَّمَاوَاتِ وَمَنْ فِي الْأَرْضِ وَالشَّمْسُ وَالْقَمَرُ وَالنُّجُومُ وَالْجِبَالُ وَالشَّجَرُ وَالدَّوَابُّ وَكَثِيرٌ مِّنَ النَّاسِ"** الحج: ١٨ الكون ده كله بيسجد لربك سبحانه وتعالى.

يا اللي مابتصليش لحد دلوقت مش مكسوف إن الجبال والشمس والحجر والقمر والدنيا كلها بتسجد لربنا وإن رافض تسجد لربنا!، لو رفضت تسجد لربنا وفضلت على كده يوم القيامة لما يُكشف عن ساق مالك الملك وملك الملوك **"يَوْمَ يُكْشَفُ عَنْ سَاقٍ وَيُدْعَوْنَ إِلَى السُّجُودِ فَلَا يَسْتَطِيعُونَ * خَاشِعَةً أَبْصَارُهُمْ تَرْهُفُهُمْ ذِلَّةٌ"** إيه السبب؟ **"وَقَدْ كَانُوا يُدْعَوْنَ إِلَى السُّجُودِ وَهُمْ سَالِمُونَ"** القلم ٤٢: ٤٣، اللي هيرفض يسجد لله هنا ربنا سبحانه وتعالى هيمنعه من السجود هناك.. ربنا يجعلنا وإياك من الساجدين، ربنا يقبض أرواحنا واحنا ساجدين بين يدي الله سبحانه وتعالى.

الشاهد في الموضوع إن سيدنا جبريل نزل للأرض فالأرض نطقت واطكلمت وقالت له هو لسه هياخد من تراب الأرض؟! قالت: أعود بالله منك أن تأخذ مني شيئاً، فعاد جبريل عليه السلام إلى المولى عز وجل فسأله المولى عز وجل: لماذا لم تأت بالقبضة يا جبريل؟ قال: لقد عاذت بك يا رب فأعدتها، قالت لي أعود بالله منك فأعدتها ما قدرتش آخذ منها حاجة، المولى عز وجل أمر ميكائيل، خلاص يا جبريل إنت مش قادر تنفذ الأمر ده نتيجة يعني الرقة اللي في قلبك دي كلها مجرد ما الأرض استعاذت بالله منك خلاص كده انتهى، طيب انزل إنت يا ميكائيل فنزل ميكائيل عليه السلام ودخل على الأرض ولسه هيقبض منها فقالت: أعود بالله منك أن تأخذ مني شيئاً، فتركها وعاد إلى ربه جل وعلا، فقال: ما الذي حملك على ذلك يا ميكائيل، قال: إنها عاذت بك فأعدتها.

فكانت المرة الثالثة وكانت هي دي بقى الأخيرة ربنا سبحانه وتعالى أرسل ملك الموت، شوف بقى ملك الموت سبحان الملك يعني كل ميسر لما خلق له، فأرسل ملك الموت فنزل الأرض فلسة هياخد قبضة من الأرض فالأرض نطقت وقالت: أعود بالله منك أن تأخذ مني شيئاً، فقال لها: وأنا أعود بالله منك أن أرجع ولم أنفذ أمر الله جل وعلا، يعني إنت بتستعيزي إن أنا آخذ منك حاجة وأنا أستعيز بالله إن أنا أرجع من غير ما أنفذ أمر ربي.

فأخذ من كل قطعة جزءاً من تربتها فجمع قبضة وده دليل على عظم خلق الملائكة، حبيينا -صلى الله عليه وسلم- لما رأى جبريل على صورته الحقيقية مرتين قد ملأ ما بين السماء والأرض وما بين المشرق والمغرب، تخيل حضرتك حجم سيدنا جبريل لما تعرف أن ما بين الأرض والسماء مسيرة خمسمائة عام، سيدنا جبريل سد ما بين الأفق وما بين الأرض والسماء ده حجم سيدنا جبريل له ستمائة جناح، بجناح واحد، بريشة من جناحه قلب خمس قرى، خمس محافظات، قرى قوم سدوم اللي هي قرى قوم لوط ورفعها إلى السماء حتى قال الحافظ بن كثير: حتى سمع الملائكة صوت نباح كلابهم ثم جاءه الأمر من الله عز وجل "فَجَعَلْنَا عَلَيْهَا سَافِلَهَا" الحجر : ٧٤، فنزلت إلى الأرض تلك القرى الخمس بريشة واحدة من جناح سيدنا جبريل.

فملك الموت أخذ من كل قطعة من الأرض جزء يسير من تربتها، جمع القبضة دي كلها وأحضرها بين يدي الملك سبحانه وتعالى، فلما رآه المولى عز وجل قال له: أما رحمت الأرض يا ملك الموت، أما رحمت الأرض حين تضرعت إليك؟ طيب هي تضرعت إليك وقالت لك أعود بالله منك إن أخذت مني شيئاً إنت ما رحمتهاش؟ فقال ملك الموت: لقد رأيت أن تنفيذ أمرك أوجب من قولها، هي تقول زي ما هي عايزة الأرض تتكلم زي ما هي عايزة لكن تنفيذ أمرك يا ربي أوجب.

يا مسلم يا حبيب قلبي.. مافكرتش في يوم من الأيام إن صاحبك لما يقول لك صلاة إيه اللي إنت رايح تصليها؟ مافكرتش تقول له إن أمر ربنا أوجب من كلامك؟!، مافكرتيش يا أختي ياللي مالبستيش حجاب لحد النهارده لما صاحبك بتقول لك معقولة هتلبسي حجاب! وتبقي دقة قديمة ويبقى منظر مش حلو وماتبقيش البنت الحلوة الجميلة الشيك اللي بتلبسي وتعملي وتسووي!.. مافكرتيش إنك تقولي لها: أمر ربنا أوجب من كلامك!؟،

مافكرتش وانت بتتق أمك وأبوك والناس بتقول لك أيوه كده ماتسمعش كلامهم واثبت شخصيتك مع الأم والأب
مافكرتش إن أمر ربنا أوجب من كلام الناس وإنك انت لازم تبوس إيد أبوك وأمك وتسمع كلامهم وتعمل كل اللي
عايزينه مادام مش في معصية لله سبحانه وتعالى.

مافكرتش وانت بتاخذ رشوة أو بتاخذ مال حرام إن ربنا لما أمرك إنك تاكل حلال وتبعد عن الحرام مافكرتش إن
أمر ربنا أوجب؟!

الشاهد في الموضوع إن ملك الموت سمع الكلام ونفذ أمر ربنا وجاب القبضة وحطها بين يدي المولى عز وجل
وبدأت مراحل الخلق.

المولى عز وجل خلق آدم من تراب، عُجنت هذه القبضة، القبضة دي اتعجنت واتشكلت في صورة إنسان لكن
لسه لحد الآن مفيش لا جسد ولا روح، هي طين فقط المية اختلطت بالتراب فأصبحت طين وسابوها تُركت، تُرك
سيدنا آدم عليه السلام لحد أما الجسد ده أو الجزء اللي اتعمل بالمية ده والتراب لحد ما أصبح كالفخار، حاجة
كده إيه ناشفة وخلاص، وكان آدم عليه السلام في هذه المراحل جسد بلا روح اتحول الفخار إلى جسد ثم تُرك
فترة من الزمن.. أد إيه؟ بعضهم يقولوا ٤٠ سنة وبعضهم يقولوا ٤٠٠ سنة وبعضهم يقولوا ٤٠٠٠ سنة، مفيش أي
دليل على الكلام ده كله، لكن هي فترة قال عنها جل وعلا "هَلْ أَتَى عَلَى الْإِنْسَانِ حِينٌ مِّنَ الدَّهْرِ لَمْ يَكُنْ شَيْئًا
مَّذْكُورًا" الإنسان: ١، هي دي الفترة التي تُرك فيها آدم بين أن يكون جسدًا بلا روح وبين الفترة التي دبت فيه الروح
هي دي الفترة التي ربنا قال عنها "هَلْ أَتَى عَلَى الْإِنْسَانِ حِينٌ مِّنَ الدَّهْرِ لَمْ يَكُنْ شَيْئًا مَّذْكُورًا" .

من هنا بدأت قصة الصراع

تُرك آدم عليه السلام في الجنة مدة من الزمن لا يعلمها إلا الله سبحانه وتعالى، ولما اتخلق سيدنا آدم بالمنظر ده
وبقى جسد بلا روح مين بقى اللي بدأ يقرب من سيدنا آدم؟ هي دي قصة الصراع إبليس هو إبليس ده كان شغال
إيه؟ هو كان ملك؟ لا ماكانش ملك، أُمال كان عايش فين؟ كان عايش مع الملائكة، طيب كان عايش مع الملائكة
فين؟.. في الجنة؟

آه في الجنة لكن كان بيعمل إيه؟ كان بيعبد ربنا يعني إبليس ده كان كويس، ده كان كويس جدًا، ده كان يعني من
أولياء الله الصالحين، كان عبد لله بجد، كان من الجن آه لكن كان مؤمنًا تقيًا نقيًا كان بيعبد ربنا ليل ونهار، أُمال إيه
اللي حصل؟ هتعرف دلوقت إيه اللي حصل..

فإبليس كان جواه لسه برضه يعني على أد ما كان بيعبد ربنا وعلى أد كل اللي كان بيعمله ده كله لكن كان جواه
حاجة مش كويسة، فبدأ يطيف حوالين سيدنا آدم، يدور حواليه، جسد بلا روح، هو ليه ربنا خلقه؟ طيب وده هيجي
يعمل إيه؟ ياترى هياخذ المكانة بتاعتنا؟ ياترى هياثر على المكانة والحياة اللي احنا عايشينها دي؟ ياترى ياترى؟،
مية ياترى دارت في ذهن إبليس في الوقت ده.

وبدأ يطوف حوالين سيدنا آدم والحديث في صحيح مسلم قال -صلى الله عليه وسلم- " لَمَّا صَوَّرَ اللَّهُ آدَمَ فِي الْجَنَّةِ تَرَكَهُ مَا شَاءَ اللَّهُ أَنْ يَتْرَكَهُ. " تركه فترة جسد بلا روح قبل ماتدب الروح في آدم عليه السلام " ..فجعل إبليس يطيف به ينظرُ ما هو " يلف حواليه " .. فلمَّا رآه أجوفَ عرفَ أَنَّهُ خَلَقَ خَلْقًا لَا يَتِمَّالِكُ... " إيه رآه أجوف؟ عرف أن هو من جواه فراغ .. آه فراغ يعني ده في يوم من الأيام محتاج يأكل ويشرب ويقضي حاجته ومحتاج شهوات ومحتاج .. ومحتاج .. ومحتاج .. إنسان " ..عرف أنه لم يتمالك... " يعني هأقدر أدخل له من مية ألف حيلة هأقدر أزيّن له هو وذريته وهأقدر أعمل معاهم حاجات كثيرة وهأقدر أوسوس لهم وأقدر إن أنا أبعدهم وأعمل وأعمل، مادام هم محتاجين يأكلوا ويشربوا ومحتاجين شهوات ومحتاجين .. عرف أنه خلق لا يتمالك، وده يعرفنا إن عداوة إبليس شوف قديمة أد إيه، مش هتنتهي، هتفضل كده لحد قيام الساعة ده من أول لحظة أخويا وحبيبي نتخلق فيها أنا وانت وأنت إبليس ببعادينا.

والعجيب إن احنا لما بنتخلق بنبقى لسه أطفال صغيرين ورغم ذلك عداوته بتبدأ معنا من هذه اللحظة، والحديث في صحيح مسلم أن النبي -صلى الله عليه وسلم- يقول "ما من مولود يولد إلا نخسه الشيطان" الشيطان أول ما الطفل بيتولد بيكي .. إيه اللي يخلي الطفل بيكي؟ ده بالعكس ده المفروض إن الطفل ده يفرح إنه خرج من الضيق إلى السعة، والحقيقة هي مش سعة .. إنتوا لما تحسبونها صح تلاقوا إن هو خرج من السعة إلى الضيق، من سعة الرحم بتاع الأم وهو قاعد بياكل ويشرب ويتنفس ويلعب ويعمل كل حاجة، إلى ضيق الدنيا وهموم الدنيا وابتلاءات الدنيا وأكدار الدنيا وعداوات الدنيا، لكن هو المفروض يخرج برضه يفرح، ده خرج عالم تاني، هو إيه اللي بيخليه بيكي؟ هو مش بيكي علشان يشعر بألم ولا حاجة لا، ده هو نخسة الشيطان اللي أخبر عنها حبيينا -صلى الله عليه وسلم- "مامن مولود يولد إلا نخسه الشيطان فيستهل صارخا من نخسة الشيطان إلا ابن مريم وأمه" ويفضل إبليس في حربه السافرة ضد ذرية آدم عليه السلام إلى قيام الساعة.

خطبة إبليس لأهل النار.. اللهم عافنا يا رب العالمين

ويوم القيامة في النار ربنا يعافينا ويعافيكم يخطب إبليس خطبته المعروفة " وَقَالَ الشَّيْطَانُ لَمَّا قُضِيَ الْأَمْرُ.. " تلاقى ربنا يعافينا ويعافيكم يا رب العالمين الناس اللي هتدخل النار هيلاقوا منبر بيتحط في النار وواحد طالع فوق المنبر بيتدور .. مين ده؟ ده إبليس أول مرة يشوفوه " وَقَالَ الشَّيْطَانُ لَمَّا قُضِيَ الْأَمْرُ إِنَّ اللَّهَ وَعَدَكُمْ وَعَدَ الْحَقُّ وَوَعَدْتَكُمْ فَأَخْلَفْتُمْ وَمَا كَانَ لِي عَلَيْكُمْ مِّنْ سُلْطَانٍ إِلَّا أَن دَعَوْتُكُمْ فَاسْتَجَبْتُمْ لِي فَلَا تَلُومُونِي وَلُومُوا أَنفُسَكُمْ مَا أَنَا بِمُصْرِخِكُمْ وَمَا أَنْتُمْ بِمُصْرِخِيَّ إِنِّي كَفَرْتُ بِمَا أَشْرَكْتُمُونِ مِن قَبْلُ إِنَّ الظَّالِمِينَ لَهُمْ عَذَابٌ أَلِيمٌ " إبراهيم : ٢٢

تعالوا نكمل قصة الصراع الحلقة الجاية إن شاء الله ونعرف ازاى حصل الصراع بين سيدنا آدم وبين إبليس وازاي إبليس مكمل الصراع معنا لحد يوم القيامة.

إني داعٍ فآمن من قلبك..

اللهم يا رحمن يا رحيم، بديع السماوات والأرض يا علام الغيوب اغفر ذنوبنا، استر عيوبنا، تول أمرنا، أحسن خلاصنا، فك أسرنا، يَمَن كتابنا، يسر حسابنا، يا ربنا اجمعنا جميعاً في الفردوس الأعلى، اجمعنا جميعاً على حوض النبي لنشرب من يده الشريفة شربة هنيئة مريئة لا نظماً بعدها أبداً، نجنا جميعاً من مكائد الشيطان، اجمعنا مع النبي العذنان في الفردوس الأعلى فيما لا عين رأت ولا أذن سمعت ولا خطر قلب بشر.

سبحانك اللهم وبحمدك أشهد أن لا إله إلا أنت أستغفرك وأتوب إليك، وصلى الله على نبينا محمد وعلى آله وصحبه وسلم، بحبكم في الله.

والسلام عليكم ورحمة الله وبركاته.

تم بحمد الله

شاهدوا الدرس للنشر على النت في قسم تفرغ الدروس في منتديات الطريق إلى الله تفضلوا هنا :

<http://forums.way2allah.com/forumdisplay.php?f=36>